



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 5

Yangia anidakangma :



Tir Yimyim



tir_yimyim



tir yimyim

TAPAK 7

Sept. 23 nü Franklin Graham-i
Belgium nung sayutsüngitsü

Sergey Lavrov-i N.Korea
lenir Kim Jong Un ajuru

VOL. XXII ISSUE NO. 268 (ADOK 268)

DIMAPUR

AMUNGNÜ (SUNDAY)

CHITENI (JULY) 13, 2025

₹ 5.00

Indian Constitution timtem nung lir: Christopher Tilak

Dimapur, Chiteni/July 12 (TYO): Tang yimten yimsüsür lenisüba kübok Indian Constitution nung timtem tulu ajurutsü lir, anungji nüburtemi linük amendaka aliba values kumzüka ayutsü asoshi nokdaksüla, ta AICC Secretary In-charge of Nagaland, Christopher Tilak-i ashi.

"Samvidhan Bachao Andolan" sentong nung jembidang, akhi mapang Constitution indang bulua jembiba meliasü, saka tesüba küm ter tsüngta timtem balala aser tebilemtsütem asen tenük agi angur, ta Tilak-i ashi.

"Asen temeden ya party tem nungi masü saka Constitution nungi angu, anungji onoki iba atema süoki ia bilemer," ta pai ashi. Tilak-i nüburtem dang Preamble tajungtiba nung angatetsü ayongzü, koba Indian Constitution indang tanüla

lir, ta pai ashi. "Equality, liberty, fraternity aser justice - item ya constitutional values kisting masü saka asen mulungsentsü aser tanüla nung tera yanga lir, aser Laishiba nunga angur aser küm 2,000 tejakdang Buddha-ia jangja-jangja shia lir," ta pai ashi. Lai lanurtem dang pei indang democratic temeden nung kibur akumtsü aser puti otsü zülushitsü mesüra constitutional safeguards tashi mait kumdaksüba anema nokdaksü ayongzü.

Kasa mapang Nagaland Pradesh Congress Committee (NPCC) tir aser Member of Parliament (Lok Sabha) S. Supongmeren Jamir-ia Nagaland nung aliba aser linük nung nüburtem dang Indian Constitution kumzüka ayutsü ayongzüka liasü.

Aor tanabuba Senden Riju Dimapur nung yangerogo



Dimapur yimti nung Aor Senden Riju tasenba semzüka sentong nung Nüngshilong sayaba sülen lenir Wb. S. Imtisungit Jamir aser Wb. Metsubo nati anir yimsüsürtem den ASTD aser DALT lenirtem noksa nung angur. (Dimapur, July 12, 2025).

Dimapur, July 12 (TYO) : Chungliyimti nung Aortemi mezüng Senden Riju yangluba sülen tang Dimapur nung Aortemi senden Riju ka yangertetba ya Ao kin asoshi tanabuba Senden Riju asütsü ta Nagaland Rural Development & SIRD minister Wb.Metsubo Jamiri metetdaksü.

Pai iba o ya yangi Dimapur nung ISBT anasa Ao Senso Telungjem, Dimapuri yangluba Senden Riju ki tasen tuluba ka tanü Küptoknü semzüksüba sentong nung jembidang metetdaksü.

Iba Senden Riju ki ya Ao Senso Telungjem Dimapur khuret pongpadakja Dimapur Ao Lanurtem Telungjemi senotsü bushia yangertetba ki ka lir.

Tanü iba Senden Riju lapokba sentong nung jembidang, ' iba

senden Riju ya Dimapur nung alirtem kija meyong masü saka Aor inti meyong asütsü, anungji iba tesem ya asen sobaliba tajung sayudak aser angazükdak küma, azünga meyutsüi, amshitsüla,' ta Metsuboisa ashi.

Paisa Aotsür Aortem rongnung telemsa melii ajemalua tangar asoshi tajung inyakba kin ka küma litettsü asoshi tayongzüka agütsü.

Iba sentong nung Nüngshilong lapoktsür aser ali tenla agütsür taoba Nagaland minister Wb.S.Imtisungit Jamiri jembidang, " tanü ya asenok ajak rongnung nisa tepelatiba, kechiyong akhidang Dimapur nung Aotsür Aor ajak adenshia benjongbentsü sentong tulu ayongzüka alidak tesem mali asü aser iba nüngdakji reprangteta , adianu Nüngshizenba

Longkumer küinati iba li ya tenla agütsü. Tanüba iba li nung lokti nüngdak aika katettsüsa lanurtemi mapa tajung inyakba angudang kanga pelar," ta metetdaksü.

Iba sentong nungsa tepela o ka lemsatepdang, Nagaland government nung Advisor & MLA Wb.Moatoshi Longkumeri ali tenlar Wb.S.Imtisungit Jamir aser Wb.Nüngshizenba aser parnok kinungertem dang pelaba metetdaksü aser iba Riju ya meraketa ayutsü ajungshi. Paisa Aotsür Aortem tejakleni renloka aotsü atema shisalemsatepa sentong yanglua inyaktsü nüngdakba indang lemsatep.

Iba kasa sentong nungsa Ao Senso Telongjem Dimapur tir Wb.Ningsangwabai tarur pelaa agizükba mapang agia liasü.

(Maneni tapak 2 nung...)

Assam kübok district balala nung AAMSU-i longkak ait

Guwahati, Chiteni/July 12 (Agencies): Temelaba makai ali agia aliba azüngtettsü asoshi Assam sorkari districts balala nung evection drives tesashiba agiba mapang, iba mera anema longkak aitiba tali akumer, talisa minority rights teloktem nungi kanga sashia nokdaker.

Honibarnü All Assam Minority Students' Union (AAMSU) ajanga Dhubri, Nagaon, Goalpara aser Biswanath densema district balala nung longkak ait aser iba drive ya nüburtem timtemba nung taochi mesayu aser political tejangraba nung lir ta aitsür.

Iba evection drive ya minority pur anema tasa tamajung ka lir, ta aija AAMSU-i district commissioner tem ajanga Ato Kilonser Narendra Modi, Union Home Minister Amit Shah aser Assam Chief Minister Himanta Biswa Sarma nunger nem iba "illegal evections" tangsa anentsü takhangba agüja liasü.

"Onok ya evection drive anema masü. Saka Indian senso kuli tejangja alirtem ainshidaksüba anema nokdaker. Sorkari rehabilitation asoshi kecha anepalua mali, koba magizükteter," ta Biswanath nung AAMSU indang district adviser Fakir Ali-i ashi.

Bijin nung AAMSU lenirtemi ashiba agi, meindoker ya timba tzü agi ali metenzüka aoba timtem ajurua alirtem lir, shirnok lenmang kecha maliba yong sorkar li nung alitsüsa akum.

"Tekolok shidak aliba nisung shingia sorkar indang ali amokbanga alitsü mebilemtsü. Item ya ayong agi ali metsüngzüka aoba ajanga taolen maka item ali nung oa alirtem lir,"

ta AAMSU indang assistant general secretary Rasul Khan-i ashi.

Sorkar li temelaba makai atsünga agi ta tai tonglokja alirtem ya minority kin nungi kisüng asü, ta Khan-i asüngdang. "Onoki ochi akhanger. Dangar nisungbo mali asü? Mesüra iba inyakyim ya nisung kar dak tenük yokba?" ta pai ashi.

Working President Sofikul Islam Prince-ibo 2026 Assembly elections atongtsü lia sorkari teshimtet minorities dak tenük yokba lir ta aitsü aser ibai yimtenren tsütsü ajemdaker inyakba lir ta ashi.

Sorkari court totuyuba senzüka yutsür, ta Chirang nung longkak aitiba lenir district president Nazir Rahman-i ashi. "High Court aser Supreme Court indang guidelines sülen manidaki iba evection drives ya inyaker. Ibai meimchir temeden anema inyakba lir."

Iba kaketshir tentet ajanga sorkar dang parnoki akhangba ama meinyakra state tesem ajunga nung longkak tesashiba aittsü ta shiogo.

"Onok senzüka yutsüra minority kin nungi lakh aika temai adoktsü," ta Rahman-i ashi.

July 7 nü Assam Chief Minister Himanta Biswa Sarma-i par sorkar ajanga Assam tesem ajungalen evection drives tesashiba agitsü renema aliba nenshia ashi aser illegal immigrants temi sorkar indang li nung temelaba makai alirtem meindoktsü ta shia liasü.

"Shingia onok menokdangtettsü. Bangladesh nungertem aridoktsü," ta pai sangdonga liasü.

Terenlok alitsü atema yimjung nüngdaker: Union Minister Rijiju

Dimapur, Chiteni/July 12 (TYO): Tanü Union Minister for Parliamentary & Minority Affairs, Kiren Rijiju-i investment puatsü aser tanen makai aintsü asoshi tensa junga alitsü tongtipang ta nenshia ashi.

Honibarnü Dimapur Town Hall nung Rozgar Mela sentong nung jembidang, azüdokshi, tetsübo aser longkak aitiba agi sünger alidak terenlok kecha malitsü aser region nung tesunep, yimchiyimjung aser maongka alinung dang investors tem arutsü, ta Union Minister Rijiju-iashi.

India ya rongsenketzüng tsütsü tekeratiba ainba linük ka lir aser Northeast ya terenlok indang gol ama lir ta ashi aser

yaritepa tarutsü yimchiyimjung asoshi inyaktsüla, ta pai ashi.

Ato Kilonser Narendra Modi-i lanurtem aser Northeast ajungkettsü asoshi mapa tajung balala inyakba asoshi Rijiju-i tenüngsang agüja liasü.

Tanü linük tesem balala nung 16 buba Rozgar Mela alidang sorkar mapa nung shimokba shiti 51,000 shi lema agütsür, ta pai metetdaksü.

"Ato kilonser kabu nungi nai indang indanga appointment letters agizükba ya maongka onsara tulu aser India nunger lanurtem den sendakteptsü pa nükla aliba kuli ka lir," ta pai mapa angur dang ashi.

Rijiju-i appointment letters angurtem mapa inyaker kisüng

masü saka linük tenzüker ama bilemtsü ayongzüka liasü.

"Na uniform service nunga süang, mesüra civil service nunga süang, na nübur tenzüker lir. Jenjang ajak agi Atmanirbhar Bharat yangerba nung shilem agir," ta pai ashi.

Iba sentong nung Dimapur nung aliba lanurtem nem appointment letters 110 amokja liasü.

Iba sentong nung Nagaland Deputy Chief Minister, Y. Patton; Member of Parliament (Rajya Sabha), S. Phangnon Konyak aser Advisor Imkongmar den Railways, Labour Ministry, ESIC, Bank of Baroda aser Security Forces nungi lenirtem dena liasü.

Phek Town Council tenteter kûm ka jungogo



Phek, Chiteni/July 12 (TYO): Phek Town Council (PTC) tenteter July 9 nû kûm ka jungogo. Iba sentong ya PTC Conference Hall nung agia liasü.

Sentong nung o jembiba mapang PTC mendenbuba Shevohu Nienu-i ashiba agi, "Phek ya temerekba aser tali renloka odaktsütsü nûkla yur asenok adenshi."

Tanü lepa reprangdangba mapang terenloktem jangjar aser iba den tarutsü atema asenok tali bendanga agütsüshitsüla, ta pai ashi.

Office amenoker kûm ka ajungba mapang PTC-i, jila lenmang km 4 black topping otsüogo aser iba den kilentsü tapet yanglutsüogo, ta Nienu-i ashi.

PTC-isa, jila tebor jungdaktsütsü atema jenjang agiba den PTC office yanglushi, PTC gate yanglu aser jila teyongsü nung one- stop

shopping (Bazaar) ka amenokja liasü.

Maneni Nienu-i, kûm 20 sülen 2024 kûm Nagaland nung ULB elections takok ngua ayongzüka agiba atema Chief Minister Dr. Neiphiu Rio aser pa indang cabinet dang kanga pelaba lemsatepa liasü.

Nagaland power & parliamentary affairs minister KG Kenye tenüngsanga PTC mendenbubai ashiba agi, ULB election ayongzüka agütsü atema temela masü asü, kechiyong temzüng ozüng, administrative aser loktilibaren dak sendakba nung tetsükdaktsü aika liasü.

"Ajisüaka tang sorkari kanga tasü ita iba tebilemtsütem bentetogo," ta pai ashi.

Nienu-isa, state kübok municipal 3 aser town council 36 nem development packages kecha tebandang makai lemsüba atema Advisor for Urban Development and Municipal Affairs Zhaleo Rio

dang kanga pelaba lemsatep.

Ano pai, NPF Legislature party lenir MLA Kuzholuzo (Azo) Nienu danga kanga pelaba lemsatep, shibai shisatsü balala agütsüba den rongsen aser nübu agi teyari agütsüogo.

Shevohu-isa, district administration aser departments ajak, Phek Town Public Organization, Phek Town Chakhesang Student's Union, Phek Town Women Society, Phek Town Youth Society aser ward chairmen ajak, GBs / Arogo tem, NGO tem aser Phek nung aliba nüburtem dang kanga pelaba lemsatepa liasü.

Sentong nung ADC aser EO PTC Thejakhrienuo Nisa-ia o jembia liasü.

Sentong ya PTC deputy chairperson Chetezo Akami lenisüba nung agi aser Pastor Phek Town Baptist Church Rev. Dr. Thupuchiye Kheso-i Tsüngrem temaotsü meshizüka sarasadema liasü.

DEO-i BLO training ayonger

Dimapur, Chiteni/July 12 (TYO): Deputy Commissioner aser District Election Officer, Chumoukedima-i, Chief Electoral Officer, Nagaland tetuyuba dak ajemdaker 4 Ghaspani-I aser 5 Ghaspani-II kübok BLO tem ajak training session ka July 15 nû agütsü ta mettedaktsüogo.

Iba training ya

Chumoukedima Deputy Commissioner, office indang Conference Hall nung 11 ako nungi tenzüka agütsü.

4 Ghaspani-1 aser 5 Ghaspani-II, Chumoukedima kübok Booth Level Officers ajak dang iba training nung tamakok maludaktsüi arua shilem agütsü tetuyuba agütsüogo.

Administration-i office tem semdangtsü: DC

Dimapur, Chiteni/July 12 (TYO): Deputy Commissioner & Vice chairman of DPDB, Sara S Jamir-i ashiba agi, administration-i ita nung khen anaben ka osang magütsü office tem semdangtsü aser iba mapang office kar danga mapang inyakba anogo/mapang office shibanger lira Chief Secretary nem jenjang tapet agütsü atema osang agütsütsü.

Iba osang ya lai Niuland District Planning & Development Board (DPDB) semden amenba mapang mettedaktsü. Laisa ketdangsur shirnok district toktsür aotsüsa kümdir parnok dang DC dang leave meshitsü mettedaktsüogo.

Jamir-i, RD Department ketdangsurtem dang scheme/ project tem ajak atakzüka aliba mapang tahi nung tembanga

inyaktsü mepshia mettedaktsü, kechiyong iba department yagi district kübok kibong ajak den indang indanga inyakshangshir, ta ashi.

Senden nungsa Local Area Development Programme (LADP) 2025-2026; LADP Schemes kübok PHC, Kuhuboto nung multipurpose Yoga Hall aser Laboratory ka yanglutsüba; Society Registration (Murumi Society) züngoksemshitsü; Abrika Memorial School Zaka class 5 tashi aliba class 8 tashi ajungkettsüba amala ontük balala benoka sensaksema liasü.

Senden nungsa Lead District Manager (LDM SBI) aser Rural Development Department-i, department inyakim indang power point presentation agüja liasü.

MCP semdangtsü aliba anogo thinener

Dimapur, Chiteni 12 (TYO): MLA aser Committee on Public Undertakings (2025-2026) mendenbuba Dr. Sukhato A. Sema-i, COPU-i Wazeho nung Mini Cement Plant (MCP) semdangtsü sentong aliba thinenba mettedaktsüogo. COPU-i iba tesem ya July 10 aser 11 nû semdangtsü lateter liasü, saka tsüngsang kanga majungba aser lenmang koma ali mejangjaba ajanga thinenogo.

AR-i Peren nung sentong balala ayongzüka agi



Dimapur, Chiteni/July 12 (TYO): Assam Rifles-i ayongzüka Peren district nung nüburtem aser tongtibang stakeholder tem nem shilem agidaktsütsü atema ajungmesotsü asoshi lecture aser sensaksem sentong ka ayongzüka agiogo.

Infrastructure, aluyimba, medical facility aser tanurtem education dak rangloker iba tesem terenlok atema lenmang

yanglutsü nükjidong nung iba sentong ayongzüka agiogo.

Iba sentong nung aluyimertem, lokti lenirtem, healthcare worker temi shilem agia liasü. Sentong ya terenlok atema ajak longjemer inyaktsüba, tangar dak metaloker malitsüba aser nûkla tejangja yur sentong yanglutsü koda tongtibang iba indang lemsatepa tenzü. O jembiri pei terenlok asoshi pei ket nung aliba

rongsen amshitsü asoshi local tem nem tashi agütsütsü koda tongtibang iba indang lemsatep.

Sentong ajanga shilem agirtem dang pei tarutsü yanglutsü asoshi yakyaka shilem agütsü ajungmesoa liasü.

Local tem den teka amteper inyaka lenla ajak nung Nagaland terenlok atema Assam Rifles bendaga agütsür aliba iba inyakim ajanga maneni sayuogo.

K.G. Kenye-i aser Zhaleo nati senden ayonger

Dimapur, Chiteni/July 12 (TYO): Minister, Parliamentary Affairs aser Committee to Examine the Applicability of Laws Passed by Parliament (CEALPP) mendenbuba K.G Kenye-i, sangdong ka ajanga CEALPP senden ayongba mettedaktsüogo.

Iba senden ya July 15 nû Nagaland Legislative Assembly

Secretariat, Kohima kübok C. Chongshen Committee room nung 11.00 ako nungi tenzüka amentsü.

Iba dak sendakba nung committee züngsem ajak dang tamakok maludaktsüi arua shilem agütsü mepeshia mettedaktsüogo.

Kasa mapang nung Advisor aser Committee on Subordinate Legislation,

Nagaland Legislative Assembly mendenbuba Zhaleo Rio-i, July 16 nû 12 ako nungi tenzüka committee senden ka amentsü ta mettedaktsüogo. Iba senden ya Nagaland Legislative Assembly Secretariat, Kohima C. Chongshen Committee Room nung amentsü. Advisor-i Committee züngsem ajak senden nung adentsü atema mapang agütsütsü mepeshia

Aor tanabuba Senden Riju... (Tapak 1 nungi...)

Iba Senden Riju yangertetba tepela lokti den lemsatepba mapang, DALT tir Wb. Tiatemsü Longchari, "iba senden Riju ya lokti asoshi senotsü nung aser sobaliba nung tajangzü. bener arutsüba tesem ka asütsü," ta mettedaktsü. "Dimapur Ao Lanur Telongjem ya Aotsür Aor atema jung asütsü tenzü. aser DALT nungbo yimtsüng aser tzükong telemsa mali, ajak Aor aser ajak Dimapur senso ta züngshir," ta paisa shisem.

Iba Senden Riju yangluba osang agütsü dang, "iba ki yangertsüba mapa ya 2014 kûm tenzü. aser mezüng raffle ka asayaba nungi sen lakh 45 tashi ngutetba nungi tenzüka kija kibong, lokti balala nungi tenla aruba den ano government nungia yimsüsürtemi yaritepba ajanga sen crore ana junga nguteta iba ki ya renemogo," ta tepelaba o ka iba ki yangerba nung DALT Committee Convenor Wb. Limatangit Lemturi mettedaktsü.

Kasa sentong nungsa iba Senden Riju Monitization Committee nung tayonger Wb. Mongkum Jamiri Senden Riju tarutsü nûkla indang lemsatep aser melepzüng o iba ki yangluba Committee nung tezülur Wb. Aotemsü Aieri mettedaktsü.

Iba sentong lenir Wt. Wangshikokla aser Wb. Imkongsüngküm na liasü.

Tanü iba sentong nung Ao Kaketshir Telongjem Dimapur purtemi ken tajung ka aten. Iba senden Riju meshiteta Rev. C. Walu Wallingi sarasadem aser sentong lapoka East Dimapur Ao Baptist Arogo nung sannüker Rev. Jongpong Imsongi sarasadem aser Indisen Baptist Arogo nung sannüker Rev. Sentiangeri sarasadema sentong tembang.

Iba ki yangluba nung sen ajak agi crore ka ser lakh tir asem endok aser nisung 1500 dak tali ayongayonga mentettsüsa yanglua lir. Iba ki temeket nung soruchiokdak aser metsümeshidak kitema jungjunga yangluja lir.

Iba tesem nung tamasa yangluba senden Riju dena lir aser yangji lokti senden tila katettsü aser tang tasenba nung lokti senden tulu litettsü. Iba tesem ya tang nungibo nüngdakba purtem ajaki amshitsü akoktsü.

Himachal nung tzünglu dak sendakba
lendong nung nisung 92 süogo



बैंक ऑफ महाराष्ट्र
Bank of Maharashtra
 महाराष्ट्र शासन
 एक धनीसुख एक दीर्घ

GUWAHATI ZONAL OFFICE
 1st Floor Dwarka Center, Sani Ram Bora Path,
 Near Bora Service, Ulubari, G S Road Guwahati-781007,
 Phone: 03612458565, e-mail: dzmguwahati@mahabank.co.in

Salience notice for sale of
 immovable properties
 (Appendix - IV-A)

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kūbōk Rule 8 (e) nung ajemdaker E-Auction ajana kiojen ayoktsū atema sangdonger.

Public aser talisa sen apur/tem aser Guarantor/tem dang ya sangdonger- Bank of Maharashtra dang mortgaged/charged sū aliba tsunglanglen shia aliba kiojen Bank of Maharashtra nung Authorised Officer-i agiadokogo, aser table nung shia aliba sen apur (tem) aser Guarantor (tem) dang nungi sentsūh alangzūktsū atema Bank of Maharashtra-i iba kiojenji 22/08/2025 nū "Kong koma ali", "Koma lidir yamai" aser "Yanggi aliba ajak" basis nung ayoktsū. Sen apur/tem aser Guarantor/tem, sentsūh, kiojen osang tongmelang agi, kiojen agiba, reserve price aser earnest money deposit ajak tsunglanglen yamai agūsūr:

Sen apur teningtem/ Co-Borrowers / Branch Name	Sentsūh	Kiojen osang tongmelang agi	Possession Type/ Reserve Price / Earnest Money Deposit
i) Kihikali Awomi	Rs. 57,24,593.00	H/No. 31(A) Near Nagaland Rural	Symbolic Possession
ii) Mr. Ikhadu Aye	(Rupees Fifty-Seven Lakh Twenty-Four Thousand Five Hundred Ninety-Three Only) den 12-08-2024 anogo nungi lateta aliba rates nung future interest aser tanga charges	Burma Camp, Dimapur, Nagaland nung PATTA No-607, DAG No-793, Block No. 3, Mouza No. 1 nung ali tasazūk 508.36 Sq. Mtr. (5472 Sq. ft.) aser iba kibong nung Mr. Ikhadu Aye & Mrs. Kihikali Awomi nati asūba G+2 storied residential building.	Reserve Price: Rs. 2,13,79,255/- (Rupees Two Crore Thirteen Lakh Seventy-Nine Thousand Two Hundred Fifty-Five Only).
Branch: Dimapur			EMD: Rs. 21,37,925/- (Rupees Twenty One Lakh Thirty Seven Thousand Nine Hundred Twenty Five only).

Iba kiojen ayoktsū atema tatelatbatem tejanga metettsū asoshi Bank indang website nung iba link [**Authorised Officer & Dy. Zonal Manager**
Bank of Maharashtra, Guwahati Zone](https://bankofmaharashtra.in/asset-for-sales-search aser E-Bkray portal (https://ebkray.in/eauction-psb) nung reprangang. Helpdesk Email: support.ebkay@psballiance.com, Contact No. +91 - 8291220220.</p>
<p>Date: 10/07/2025

Place: Guwahati</p>
<p style=)



TIR YIMYIM YIMOBILEM (EDITORIAL)

DIMAPUR

AMUNGNÜ

CHITENI 13, 2025

Lanurtem Mapang

Tanü alima ajunga nung lanurtemi yimsüsüba aser ketdangsüba mapang lir. Aji oda, nütsüng yongsük agia lanurtem teimba asünungji tanü teimbai mulungba agiba aser loktiyimten yimsüsüba maparen ajunga nung lanurtemi mulungba lenirtemiang yimsüsütsü maongka angur. Aji oda, lanurtem dak aliba tashi ya atamata tashi masü. Iba tashi jagi yimten, arogo aser lokti anir. Aji oda, lanurtem jungra alima ajungtsü aser lanurtem mejungra alima majungtsü ta asüba tensa ka nung asenok liadokogo. Akhidangbo, putu menden nung tatartemi kechi shidir itemji lanurtemi inyak saka tanübo yimtsüng aser lokti aika nung lanurtemiang ashiba aser lemtetba sülenang yimtena anidaksüsa kümogo. Tanü Nagaland tatar senden nung amenertemjia lanurtemi pei taküm bendanga agüja shimtetba purtem lir. Aji oda, tatartemji mejungra lanur tamajung purtemi shimtetba asütsü aser tajung süra lanur tajungtemi shimtetba purtem asütsü. Tetezü tanübo, yashi amato masü, nüngsena lanurtem aser nüngsanga lanurtem agiba putu lir. Akhidangbo, lanurtem dang taintemi asüng lima aser tarutsü mapangji nenok meyong ta shia ajungshia liasü saka tanü lanurtem yabo asüng atema dang masü saka tanü asoshia lenirtem lir, kechiyong parnoki mulungba nung yimten, arogo aser lokti anir. Iba ama mapang ka nung lanurtem nem tangatetba tajung agütsütsübaji kidang tsüraburtemi magütsüteter aser school nung tesayurtemi makoker. Tanü asen kibong, lokti, arogo aser yimten nung tebilemtsüji ibaji lir aser alima nung lendongji iba nung jagi adoktsü. Iba ama tensa mapangji angateta tanü sorkari lanurtem nem shisaliok tajung agütsütsü asoshi sen aika endoka meranger, arogoia asentenshi sentong tapu balala ayongzüka lanurtem anepalur aser lokti tentet balalai lanurtem tamajungba lenmang leni moudaktsütsü asoshi tangatetba agüja anir. Item ajakji kanga junger aser teyari tulu angur. Ajisüaka, item ajakji kibong nung sarasademba, kibong nung ajungshitepba aser kibong nung koma anepalur, item dakji keta lir. Kibong ya tetsü o tebu na den tanurtem aliba ki aser tesem ka dangbo masü saka tanurtem agi tagidak akaba lanurtem kuma yanglutetba tesem ka lir. Aji oda, tanü kibong aika nung tsürabur sarasadem agi lanurtem tajung aika anitetba angur. Ajisüaka, ano temulung ashitsüka anguba kaji, lanurtem aika tajung kümner saka tsüraburtem dak tashimait aliba ajanga mekümteter. Lanurtemi Tsüngrem o jangrar saka tsüraburtemi mejangrar. Lanurtemi shiner, lanurtemi mangdang angur aser lanurtemi takok tajung bener arur, saka kidang kibong nung tsüraburtemi peisasa pei taküm aser pei bang mazüokteter. Iba jagi tanem-tanemi lanurtem aika jungnüseta majunger aser item jagi yimten aser lokti nem timtem bener arutsür. Atangji, tanü ya lanurtem mapang aser lanurtem putu asünungji lanur tajung adokdaksüba kibongji takok tulutiba anguba kibong süra lanur tamajung adokdaksüba kibongji tamakok tulutiba kibong asütsü. Atangji, kibong shia alima nüngdak teyari angudak sorkar lir aser tanüla chiyongtsü angudak arogo lir. Aji oda, yimten aser arogo nung lenirtemi lanurtem atema aria bilema inyakra, memetetika asüngbo kibong ajunga jungadoktsü aser alima yimjung nung alitsü. Tanü lanurtem yabo akhi amato masü. Akhidangbo, ariju ozüng agi lanurtem alen aser azüok, yimtak room ozüng tesashi lanurtem ajaki tsübu tashi anga, school nung tesayurtemi tsüngrem ama bilema akümtsübu. Ajisüaka, tanübo Tsüngrema metsübuba lanurtem aika adokogo. Item jagi asenok atema yimten nung telemtetba agitsü, arogo nung maksü bener arutsütsü aser lokti tipdema meyutsütsü. Iba ama putu ka nung kidang aser school nung ozüng kija agi lanurtem mazüoktetsü. Tanü lanur putu nung lanurtem azüoktsüba lenmangji ka dang lir, Ibaji Tsüngrem O. Aji oda, lanurtem dang Tsüngrem o ashitsü atema kidang tsüraburtem, kaketreju nung tesayurtem aser lokti atema arogoi renemtsüla. Tanübo joko, arogo shia nung tanur aser lanurtem atema sen teimba endoka meinyakra missionary adokba arogo masü missionary nüngdakba arogo ang kumadoktsü.

OLEMSABANG

Sobaliba Libaliru Tamajung Kar

P. Renthly Jamir.

(Yashi adok nungi...)

3. Azümesener chidiyungdir-a liasü. Sobangsang otsüjia azümesenersa. Ano tetsür nubentsür chidiyungdir azümesener ken yamaisa tena aru.

Yeyi sünglang pena tsükmla, kishi atsü lula-i

Ye tetsü nüngtem atemer, tebou nüngtem atemer

Meshimeyak jarong küpa chimala.

4. Mangyangba kin, tenük melen tenük tepo melen tepo pi dang tai matoktsü nisung ajak tulu shisangba ni tambu onok tebou tambu nenok tanubo ozü tama ner tesü. Kinjibo yutsür kidong (clan, sub-clan) tali. Yimshia chikhu bener okalen senzüba Jamir o Longkümer na masü. Jamir o Jamir na Longkümer o Longkümer na onok yimdak ano Jamir rongnunga nüngja telemsa tapu pongu trok lir. Ozü tambu ner tanubo, onok tajungba ner tamajungba aji Aor yimya, Yashi tashi Mokokchung SDO court, Dobashi court len okalen senzü.

5. Sobaliba tajung ochishir kin ta sayutsüngir ya khenyongi tiazü. Tiazü ta asüba kuli kar tang Aor yim mashie ka putu yimsüsür ka dang ner yim kümer küm kwi ta asüngdang nung shingaia shitak mashitsü. Tawa All India Radio Kohima nung jembidang süra obou ner yim kümer küm kwi ta asüngdang nung küm meyi ka ta ashiba angashia ni par yim akümba küm apidang nung teimba agi küm noklang pezü shi adoker. Ano Aor kidong kar otsü kakat nung oboulai sü semerben achi ta zülua angu. Nisung kati sü khen achidang semer lir-a achitsü akok. Saka nisung ka arishi tepiyong nung sü semerben kodanga machitsü, aji alima nung tamakoktsü mapa lir. Ano Aor tenüng Semerdangba lir ajia tiazü, iba lima nung bomb tsükdakja samatsü mesüra nisung kati kodanga nisung semer kolak matangtsü. Aser Aor Arogo aika Jubilee kakat tashi nung yim akümba küm tai zülua lir, Pastortemia ochi mejembir. Tatalokba kuli ka, 1998 February ita nung pastor ka ajuru, pastorba kolen senzür ta ni asüngdang saab-bai E-Roll nung zülua aliba ya shitak südi ta sayuji hau shitaka ta shir tuguraya ta menüa ashi. Parnokji census dangbo anaben agi E-Roll ang teimba liasü. Tanü Nagalima ochimashi teraksa tulutibaji census dangbo E-Roll nung nübu teimba züluba ya lir. Aser ya aseni ochi mashi tenzükba lir.

6. Awashi memetet kodanga tenük masüngba kodang tzümaleni bazari ludir miima agitetba dang masü metsü süngo ngangshi puwa ka alinunga ano talila ishika enokjang ta asüba yimya tamajung.

7. Tanur tazüokba chir kata mali aonunga anepdanga nüpenerbo kidang tanur raratep manen kar ajeber kar chir mechiyong tsükisena ao yimdong nunga anogopiyong raratepa lung agi ontepa amung tangar meyong süngjanglijang ajak auyaa chitsür school nunga tesayur tanur raratepba mazüokmar. Anungji Howard and Harriet Houston kakat NAGALAND ADVENTURE (1947-1953) nung yamai zülua lir, "Nagas don't discipline their children" (Tanur kodanga mazüoker).

8. Onsara memerük tasümanng tzüin mi apur awa ayu, shiruru tasüba ajak achi Ak o An den külemi ali. Shiruru rongnung memerükbaji Ak lir. Ak tzüin nisung atep tetsüngda kiküm feet asem shi ka ait. Ak jagi pa scü chir tokolak sünga bener arutsü. Kiküm nungji angudaker tokolakji peretdang scüji atepdak chipo aonpo tashi rakloktsüli ta asü. Iba yagi tashitak tamajung wara shira khena maneni tongtibangsa dysentery saktsü pokshi yim ajak nungsa prokshi. Kechiyong tetsür tanur ajak scü kidang kozütsü teburtem amongdang ki anasa süng kar laloka yur kozütsü. Asenok sobaliba nung tsüraburbo khenyongi tokuro mali tagütsünü tesa ama jembir. Saka pa scüjia par Ak nemang chidaktsünür. Onok tanur asüdang medemer ka scü kozür par Akji ngotoker kidanger Ak kati chia alidang pai tebu Nü bener arur Ak dakji atsüng. Tila tanur scü kozüba saktsüba azü nem chidaktsü, telang aidoktsü maka azü nem menakdaksütsü. Item ya tiazü ta aikati bilemtsü, saka ni ajakbo ano mezülur. Aser shitaka ta kuli asütsü ken tatsütsü kar enoka zülur. Asen sobaliba libaliru nung Ak aser scü indang ken yamai.

Ak oksü tejak memeila,

Toku nung scütem chimala.

Onok tanur asüdangbo drama tamasa ya tenla kidang sayutsü. Hindi love song atentsü lutsüluraba kena atentsü ta liasü. Aser school tanur sodi sentepdang aonung sentep nung students nem mapangsa agütsü, yamaji 1958 nung ano Mokokchung azünger yimer student nisung asem pezüdang alidang aonung sentep ka nung nisung kati tepela o tatsüka jembir kümedemer ka künati ken ka tenti tasür pulfit nung iba ken ya atenba ni dang bilemteter. Kensü Ao ken N0.148 leplazü nungi agitetba.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sept. 23 nü Franklin Graham-i Belgium nung sayutsüngitsü



1975 küm July ita nung sayutsüngir, Rev. Billy Graham-i Belgium yimtiba, Brussels nung evangelistic sentong ka nung sayutsüngitsü lia pai lanur telok ka den jembidang tangokba noksa nung angur.

July 12, 2025: Taküm September 27 nü Belgium yimtiba, Brussels nung evangelism sentong tuluka ayongzüka agitsü; iba sentongji Belgium nung Arogo 535-i Billy Graham Evangelistic Association (BGEA) den senteper ayongzüker.

Nüngtugu sayutsüngir asür, Billy Graham'er jabaso, Franklin Graham-i ING Arena nung ayongzükbä 'Festival of Hope' sentong nungji o jembitsü.

Franklin Graham ya BGEA nung Tir aser CEO lir.

September 7 nü Brussels nung aliba La Madeleine hall nung 'Pursuit' ta ser Belgium nung lanurtem atema sentong ka tama ayongzüka agitsü.

Franklin Graham-i sangdong ka ajanga, "Flemish, Brussels aser Walloon nung aliba Arogotem den longjemer inyaksü aliba atema ni pelar. Onoki nüburtem nem chichiba teimla agütsüner aser tamang jenjang tashi itdaksüner," ta metetdaksü.

"Alima nung tebilemtsü balala atema telangzübaji yimtenren masü saka tanelaren lir. Belgium nung Tsüngrem temeim indang lemsateptsü atema ni yongyar," ta pai ashi.

Festival of Hope sentong nungji adentsü atema Belgium tesem balala nungi nisung 7500-i bus aika mekazüka yuogo.

Festival of Hope nungji Dutch oshi jembiba Arogo 145, French oshi jembiba Arogo 263 aser Belgium tesem balala nung aliba International Arogo 127-i shilem agitsü.

Festival of Hope sentong atema Flemish aser Walloon nung denomination 20 nungi Arogo lenirtem ita shia adenshia iba sentong atema renemer.

Iba sentong nung adentsü atema ajak pelaa jaoker, ta BGEA-i metetdaksü.

Federal Synod Tir, David Vandeput-i, "Tang alima nung

yimtenren aser rongsenkettzüng dak sendakba tensa mejungi lir. Belgium-ia teimla osang nüngdaker," ta ashi.

"Brussel-i jaokba ama Rev. Graham-i agizükba atema denominational lenirtem kanga pelar. Festival of Hope sentong akatsü aliba ajanga iba linük nung Khristantem longjemdaksüogo. Onok ka küma longjemer. Iba teimla aser telongjem ya Arogo atema dang masü saka Belgium nung nisung ajak, oshi balala jembir ajak aser sobaliba balala benshirtem ajak asoshi lir," ta paisa metetdaksü.

Osangbener den jembidang BGEA otongdar kati, "Belgium nung oshi, sobaliba aser tanga lenla balala ajanga timtem jenti lir, ajisüaka tang Arogotem rongnung jangratemtsüka atalokdar. Pastor temi tang tensa ama kodanga majangshidang," ta metetdaksü.

Lanurtem atema sentong 'Pursuit' ji Flanders, Brussels aser Wallonia nung aliba Arogotemi longjemer ayongzüker. Khrista dak amanger lanurtem ajungmesotsü nükjidong nung lanurtem atema-a temeja sentong ya ayongzüksüogo.

"September 7 nü lanurtem atema ayongzüksüba sentong nungji lanur aika adentsü imlar; iba sentong nung lanurtem dang tangar den Khrista osang tajung lemsateptsü atema ajungshitsü aser tasü itdaksütsü," ta BGEA-i metetdaksü.

Pursuit sentong ayongzükerterem rongnung ka aser Flemish Evangelical Alliance nung Tir, Koen Maeyens-i, "Onoki jangratemtsü tensa ka ajangshidar. Tang mezüng Belgium nung evangelical Arogotem aika longjemer inyaker," ta metetdaksü.

"Oshi balala aser sobaliba balala ajanga Belgium nung telemsa adoka lir, ajisüaka tang temelenshi ka adokdar," ta

paisa metetdaksü.

Küm 50 tejaklen (1975 küm July ita nung) Franklin Graham tebu, Billy Graham-ia iba yimti semdanga sayutsüngia liasü.

Brussels nung aliba Arogo ka nung pastor, Rev. Domenico Rampello-i pa tebur chanu ka dang asüba mapang Rev. Billy Graham-i iba yimti nung sayutsüngiba bilemteta jembii.

Domenico-i, "Küm 50 tejaklen Franklin Graham tebu, Billy Graham-i Brussels nung sentong ka nung sayutsüngia liasü; ozü tsüraburtemi ni-a iba sentong jagi anir oa liasü. 1975 kümji ni tebur chanu ka dang liasü, aser tanü ni iba sentongji tera manüa dang bilemteter. Kü taküm nung ni temesepba mozü chiogo aser yokogo. Ajisüaka ni arrshi küm 25 asüba mapang nung Tsüngremi ni tanaben ajaba sülen nungi kü taküm teti asoshi melenshi," ta ashi.

Domenico Rampello ya tang Uccle nung aliba La Providence Arogo nung pastor inyaker. Franklin Graham-i Brussels semdangtsü, ta pai osang angazükba sülen pai küm aika tejaklen Billy Graham-i iba yimti nung sayutsüngiba bilemteta liasü.

"Billy Graham'er jabaso, Franklin Graham-i Brussels semdangtsü ta osang angazükba sülen ni tesüiba mapang bilemteta temelung raksa," ta pai ashi.

"September 27 nü Belgium nung alirtemia iba maongka angutsü, ta meteta ni kanga pelar," ta paisa shisem.

September 27 nikongdang 6:00 ako nung Festival of Hope tenzüka ken atentsü. Iba sentong nungji Khristan osangtajung kentenertem Charity Gale aser The Afters-i shilem agitsü.

Festival of Hope indang osang tejangjaji BillyGraham.org/Events/Festival-Of-Hope nung angutsü, ta BGEA-i metetdaksü.

ANOGO ABEN TSÜNGREM DEN

Taochi agütsüba

"Nisung kati mekuroi agütsür, saka tali akar; tangar kati pai agütsütsü tim sota ayur, saka tanüng dang tendaktsür... "
(A. Shin 11; 24:25).

Tanü aikati sen teimba angulen bushia mapa inyaker, ita sen tulu agir tali akümer saka tagütsür ishiba akümer. Taruba renlokba ama Tsüngrem nem agütsüba renlokra, pai tenyaba mapaa tuluba inyaktettsü.

Tagütsübaji ter shilem agütsüba nungi tenzüksüla. Saka asenok tanga taochi nung arendang iba taochi nunga tali arentsü. (2 Kor. 8:7). Asenok taküm nung iba yagi mapa meinyak tashi asenoki maneni agütsüjen agütsütsüla. Yangi Dawidi ayongzükbä ajiang: "Ni angati agi dang Kibuba kü Tsüngrem nem tarungba tenla magütsütsü "(2 Sam. 24:24).

"Ni Tsüngrem nem kwika agütsütsü?" Khristan aikati iba tasüngdangba asüngdang. Tasüngdangba shitakbaji, "Ni atema kwika ayutsü?" Aseni agütsüba nung tenük merangloksüla, saka aseni kwika agizük iba nung shisadangtsüla. Aseni agütsübajiasen meyong masü. Tsüngrem nungi kechi angu iba nungi agütsür. Pa meyong Pa nem meyipa agütsür.

Nai ni atema Ne ajak agütsü, tang ni kü ajak Na asoshi agütsür ta Pa dang shidi.

Maharashtra state sorkari anti-conversion ozüng benoktsü

July 12, 2025: Anogo ishika i, Arogotem anema tejaklen Maharashtra nung bushisüngdangtsü atema Revenue Minister, kechiba ita trok tashi mapang Chandrashekhar Bawankule-i, state nung tamangba yimsü Arogotem anema meinyaker, meydaktsüba nokdangtsü atema sorkari ozüng ka benoktsü, ta metetdaksü.

Ajioda Bawankule-i, tashishiba ken otemji tama jangjatsü nüngdaker, ajisüaka tim inyakyim benshia ozüng alema asüba Tenla kitem bendoktsütsü, ta langzü.

MLA Gopichand Padalkar-i, Navapur taluka nung yimtsüng ka aser sorkar li nung ozüng alema Tenla ki 150 süogo; Arogotem jagi Gram Panchayat mesüra Home Department dang nungi temelaba magii Tenla ki asü, ta metetdaksü.

Paisa, Khristan missionary tem aser tawa Khristan yimsü agizükertemi tribal nisungtem mesüzüka Khristan yimsü dangi meypdaksür, ta tai tongloka liasü.

Osangbenertem den jembidang Evangelical Fellowship of India General Secretary, Rev. Vijayesh Lal-i, "Anti-conversion ozüng benoktsü aliba atema onoki tebilemtsü akar. Uttar Pradesh ama state tem nung item ozüng tim mesüi amshia pastor tem aser Khristantem amokmerenba tatalokba aika lir. Maharashtra sorkari linük temzüng kübok yimsü temeden agütsütsü atema inyaksü onoki imlar," ta metetdaksü.

BJP MLA Atul Bhatkalkar-

AO OSHI ANGAZÜKDAK:
TANÜ ANGAZÜKTSÜBA OJANG



Ter

- (n) züingdangba, tuko sülen (ten)
- * Onok medemer ter külemi chiyong.

Tera

- (n) ali telonglen aliba süngdong ka shilem (root)
- * Süngdong tera ajanga ali telong nungi tzü agütsür.

OLONG PAITEP # 7207

1	2					3			4	
5			6					7		
8					9		10			
			11							
12	13						14		15	
				16						
17							18			
19						20				

TIPILEN

- 1. Lenden masü - 5
- 3. Tanüla - 5
- 5. Tzü meyok - 4
- 7. O jembiba yimya - 3
- 8. Inyaktet - 4
- 10. Ninang ka - 4
- 11. Mesaklok/memeimer - 5
- 12. Zükolak tzü - 4
- 14. Bendena - 4
- 17. Alu nung tsük benden - 3
- 18. Teloktep/Külemi - 4
- 19. Tzü mali aküm - 5
- 20. Kechai-a malizüktet - 5

LANGTSÜNGLEN

- 2. Tenarong majung - 5
- 3. Sen meyong agütsü - 4
- 4. Kidang metsüba - 5
- 6. Tenüngmenük - 5
- 9. Mesük - 3
- 10. Mamatzü agütsüba shiruru ka - 5
- 13. Komo tamaitü - 5
- 15. Apitet - 5
- 16. Shiruru aputsü ayuba - 4

OLONG PAITEP # 7206 TELANGZÜBA

TIPILEN :

- 2. Tatidang, 6. Angatet, 9. Aket,
- 11. Teimsür, 13. Rara, 14. Mepishi,
- 17. Mangdang.

LANGTSÜNGLEN :

- 1. Ente, 3. Tapet, 4. Ain, 5. Taküm,
- 7. Asür, 8. Tarak, 10. Teki, 12. Raksa,
- 15. Ents, 16. Hon.

NAI-A YA METETTER MA



India nung Samsung Galaxy Z Fold 7, Samsung Galaxy Z Flip 7 aser Samsung Galaxy Z Flip 7 FE jenjang:

India nung Samsung Galaxy Z Fold 7 variants balala jenjang:

- Galaxy Z Fold 7 12GB + 256GB - Rs 1,74,999
- Galaxy Z Fold 7 12GB + 512GB - Rs 1,86,999
- Galaxy Z Fold 7 16GB + 1TB - Rs 2,16,999

India nung Samsung Galaxy Z Flip 7 variant balala jenjang:

- Galaxy Z Flip 7 12GB + 256GB - Rs 1,09,999
- Galaxy Z Flip 7 12GB + 512GB - Rs 1,21,999

India nung Samsung Galaxy Z Flip 7 FE variant balala jenjang

- Galaxy Z Flip 7 FE 8GB + 128GB - Rs 89,999
- Galaxy Z Flip 7 FE 8GB + 256GB - Rs 95,999

Assam: Goalpara kübok Paikan reserve forest azüngtet tenzüko

Guwahati, Chiteni/July 15 (Agencies): Assam nung Goalpara district kübok Paikan Reserve Forest nung sorkar ali hectar 135 shi atsünger aliba Honibarnü nungi azüngtettsü tenzüko, ta ketdangsürtemi metetdaksü.

Iba inyakyim atema excavators 40 shi aser security personnel aika yoka liasü, aser osang agütsüba mapang tashi nung mepetmesü adokba osang kecha maliasü.

"Ali azüngtetba maparen anepdang tenzüker aser kecha tetsükdaksü makai odor. District aser police ketdangsür tejentemi iba inyakyim achaayangdar," ta ketdangsür kati ashi.

Goalpara Deputy Commissioner Khanindra Choudhury-i taoba mapang

ashiba agi, ali atsünger alir parnok shilem 95-ibo parnok mulungka nung parnoki yaglua aliba kiojentem bena bener ainshio. Iba inyakyim ya Hokolbarnü benoka inyaksü liasü saka Hokolbar sarasadem aliba ajanga thinen, kechiyong iba tesem nung Muslim nunger timba lir. Iba telemtetba agiba ya Chief Minister Himanta Biswa Sarma-i jangjashija liasü.

Goalpara Divisional Forest Officer Tejas Mariswamy-i ashiba agi, Krishnai Range kübok Paikan Reserve Forest ali atsünger alirtem azüngtettsütsü asoshi iba inyakyim benoka inyaker. "Arem ali atsünger alir kibong 1,080 lir. Parnok dang taoba küm November aser December ita ali azüngtettsütsü tetuyuba agüja liasü. Iba sülen taoba ita-

a July 10 nü tashi nungbo ali azüngtettsütsü asoshi osang agütsüo," ta Mariswamy-i ashi.

Forest department-i ashiba agi, 2023 küm nungi tenzüka tang tashi nung district kübok forest ranges pezü nung ali atsünger aliba hectar 650 bo azüngtettsüo. Ali hectar 650 nung hectar 200 nungbo nisung lia liasü aser ali hectar 450 nung alu yima liasü.

Iba hopta tetenzüklen Dhubri district nung ali atsünger aliba acre 1,160 azüngtettsüo aser iba ajanga Chapar revenue circle kübok Charuwa Bakra, Chirakuta, aser Santoshpur yimtsüng nung kibong 1,100 dak kongshia liasü. Iba ali ya thermal power project ka yanglutsü benoka aliba atema Adani Group nem bendanga agütsüo.

Imphal: Airport lenmang nung ali atsünger aliba merektetsü

Imphal, Chiteni/July 12 (Agencies): Honibarnü ketdangsürtemi Imphal West district kübok Imphal Airport lenmang nung Keishampat aser Malom na tsüngda sorkar ali atsünga kiojen balala yanglur aliba intoktsüo.

Iba inyakyim ya Imphal West district administration-i anir inyak aser Manipur Police, CRPF, aser revenue department ketdangsürtemi teyari agüja liasü.

Iba inyakyim ya JCB machine ka anisemer inyak, koba Imphal West Deputy Commissioner Mayanglangbam Rajkumar-i achaayanga liasü.

Deputy Commissioner-i ashiba agi, ozüng alema nüburtem meyong ali atsünga ki ralokshiba, dokan, semtu yangluba aser lenmang aser tetsüng lenmang nokdanga oset balala yua aliba, koba ajanga

Imphal yimti aser airport anasa tesem balala nung gari senzüsenpong nung tetsükdaksü adokdaksür, item ya merektetsütsü asoshi jenjang agiyonga aoba nung Honibarnü benoka inyakba maparen ya shilem ka liasü.

Manipur Public Premises (Eviction of Unauthorised Occupants) Act, 1978 kübok provisions balala dak ajemdaker iba inyakyim benoka inyakoko.

Rajkumar-i, iba inyakyim ya maneni benoka inyaksü ta ashiba den, nüburtem aser talisa dokan kiburtem dang nübur meyong ali atsünga aruba nungi pila alitsü mepeshia metetdaksüo.

District administration-i Hokolbarnü nikongtsütsü 3 ako tashi nungbo khien atema aser teti atema yanglua aliba kiojen balala agintsü tetutyuba

agütsüba anema Khuman Lampak nung lendi nung yokyatsüyartemi longkak aitba sülen anogo ka lir iba inyakyim ya benoka inyaka liasü.

Ima Panthoibi Street Vendors' Union secretary Sapam Indira-i ashiba agi, lendi nung yokyatsüyartem iba tesem nung küm ter dak tema shishilemba aruogo aser tang parnok dang iba tesem toktsür aotsü ashiba ya tim masü. Laisa, facility tapet anepalu mesütsü tashi iba inyakyim ya anena atatsü asoshi taoba mapang Supreme Court-i tetuyuba agütsüba indang benoka jembu.

Osang agütsüba mapang tashi nung lendi nung yokyatsüyartemi takhangba agütsüba dak sendakba nung district administration-i kecha telangzüba magütsü liasü.

Meghalaya nung Bangladesh nunger ana apu

Shillong, Chiteni/July 12 (Agencies): Meghalaya Police aser Border Security Force (BSF) na longjemer meita aoba mapang East Khasi Hills district nung Bangladesh nunger ana puogo. Tena ya kuli kaket tejangja makai India-i aita liasü.

Bangladesh nunger ana nem teyari agütsü asütsü ta temulung melembi bilemba India nungera ana puogo. Osang tejangja angazükba sülen sepaitem yagi Shillong anasa Mawlai bypass

nung Guwahati-i oya aliba gari ka sot. Gari nung mena alir parnok pezüprongla ya ken o ashishitsü atema sota liasü.

"Ken o ashishiba mapang nisung anati kuli kaket tejangja mesayutet. Tena ya Bangladesh nunger ta jangjaogo. Tanungba ana yagi Bangladesh nunger ana ya ozüng alema arütsü adentsü atema teyari agütsüba nangzüko. Parnok ya Guwahati-i oya liasü," ta police ketdangsür tejen kati ashi.

BSF otongdar kati ashiba agi, iba meita aoba sentong ajanga BSF Meghalaya Frontier aser state police na küküm aliba aser longjemer inyakba sayur, koba ajanga India-Bangladesh arütsü nung ozüng alema inyaksangshiba maparentem nokdanga arudar.

BSF Meghalaya Frontier-i agütsüba data nung, 2025 küm mezüngbuba quarter nung Bangladesh nunger 78 apuba sayuogo.

Tripura nung elephant safari tenzüksü

Agartala, Chiteni/July 12 (Agencies): Eco-tourism ajungkettsü aser mimchir aser shiti na külemi yimjung nung alitsü atema jenjang tajungba kümdaksütsü nükjidong nung mezüngbuba elephant safari tenzüksü asoshi Tripura renema lir.

Iba safari ya Independence Day matong tsüngda tenzüksü sentong yanglu lir, aser iba atema inyakyimtem timba tembanga inyakoko, ta Forest Minister Animesh Debbarma-i ashi.

North East Now den jembiba mapang Debbarma-i ashiba agi, "onoki maparen timba tembanga inyakoko aser ni ketdangsürtem dang iba inyakyim tenzüksü atema maparen ajak tembanga inyaksü tetuyuba agütsüo," ta pai ashi.

Mezüngbo iba safari ya ketdangsürtem aser stakeholder temi asadangtsü aser parnoki tajangshiba balala lemsatepba sülen inyakyim asüngtetshirang nüburtem atema lapoktsütsü.

Iba safari ya Mungiakami Elephant Camp nungi

inyaksangshitsü, kong infrastructure tem yanglushiogo. Tawa iba tesem semdangba mapang minister-i elephant watchtower ka yanglua aliba asadangogo aser elephant watchers training asadanga liasü. Personnel tem timba training tembangogo, saka ano kar tang training tagidak lir..

Safari ya alima penzürttem atsüa arütsü aser shiti wazüka ayutsü aser külemi yimjung nung alitsü atema tangazükba agütsütsü nükjidong nung Forest Department-i benokba lir.

Gaza ceasefire atema jembishinüba nung teimla mangur

Cairo, Chiteni/July 12 (Agencies): Qatar nung Israel aser Hamas tsüngta Gaza ceasefire tasen aser pua alirtem chioktsü indag jembishinüba teraksar, ta iba jembishinü tejangja meteta aliba Palestine ketdangsür kari ashir.

Israel Ato Kilonser Benjamin Netanyahu-i tan hopta Washington semdangba dang "mapang alizük" aser asaa iba inyakyim terenlok melidaktsüi telemtetba agitsü asoshi tashi shidakba makar delegation ka Doha-i yok, ta ketdangsür kati ashir.

Parnoki tang jembishinüba nungia Israel sepaitem ainshitsü aser humanitarian aid lema agütsütsü onüktem dena lir.

Netanyahu ya Brehostibarnü US-i maodang, anogo ishika tsüngta tezüngzüktep ka renemtsü imlar, ta shia liasü.

Iba tezüngzüktep ajanga anogo 60 tashi rara anena aliba mapang Hamas-i pua bener aortem nungi takum alir nisung 20 nungi tesadang ka aser sür aliba nisung 30 nungi tesadang ka dak tera tali chioktsü, ta pai shia liasü.

Taoba Deobarnü nungi Doha nung ki balala nung Israel aser Hamas negotiators tem senden ti ben mena jembishinü kaogo, ajisüaka parnok majurutepi tetsüngta nung o belener yur senden amener.

Parnok den Qatar Ato Kilonser Sheikh Mohammed bin Abdul Rahman Al Thani aser Egypt nungi itdangiter ketdangsür temi yariteper aser US envoy Brett McGurk-a adener.

Tetsüngtai ia jembir temi Hamas delegation aser Israel delegation tsüngta tepang o aser tezüluba tem belener.

Ajisüaka Hokulbar aonung Palestine ketdangsür temi ashiba agi, telok ana onük kar nung kanga mejungi telemsa

adoker jembishinüba nung mangatettep adoka telaor lir.

Tang tesüsa parnoki Gaza nung humanitarian aid agütsütsü yimya aser Israel mitkartem ainshitsüba onük ana nungya rangloker jembishinür ta parnoki ashir.

Nüburtem nem teyari ya Gaza telungi aittsüla aser United Nations agencies aser international relief organisations ajanga lemsatsütsüla ta Hamas-i shijen ashir.

Külen Israel-i teyari oset ya mangatettep aliba Gaza Humanitarian Foundation (GHF) ajanga lemstsütsü meranger, koba Israel aser US teyari nung lir.

Iba onük nung telemsa adoka alidak apu aliba nung terenlok kanga ajema lir, ta tetsüngtai ia ken o jembitsür temi ashir. Ajisüaka tang tashi agreement kata yanglua mali.

Ano onük tongtipang kaji Israel nunger ainshitsüba indang ya lir.

Ponguben buba jembishinüadang Israel negotiators temi mediators nem tezüluba ka agütsüba nung Israel-i Gaza telung nung kilometre 1 aser 1.5 tsüngta "buffer zone" ayutsü shia lir.

Hamas-i iba proposal ya atsü-anem akatsü asoshi tetenzükdak ama ajitet. Ajisüaka Hamas-i meshiba ama Israel nunger ainshitsüba zones indang map nungbo parnoki ashiba den mapet mitkartem tali aita aliba sayur. Map nungya buffer zones ya tesem karningbo kilometre asem tashi telungi aita lir aser tesem aika nung Israel nunger maneni alitsüba sayua lir.

Parnoki Gaza south tsütsü Rafah yimti ajunga, Khan Younis anüdoklen Khuzaa yimtsüng shilem 85, north tsütsü Beit Lahia aser Beit Hanoun shilem tulua aser Gaza City anüdoklen Tuffah, Shejaiya aser

Zeitoun kiyongtem ayimjema lir. Hamas ketdangsür temi iba map ya Israel-i tebilemba tamajung nung yanglu aser anatsülen tamang makai akumtsü ta ashir.

"Parnoki item jembishinü kodanga süoki ia magir. Mapang alizüksü aser tiazü nung terenlok lir ta sayutsü asoshi senden ya amener," ta Palestinian negotiator kati ashir.

Humanitarian planning tenüng ameer tarutsü nung tashiyim amshia arishitsü meranger, ta ashir.

Israel Defence Minister Israel Katz-i Palestine nungertem Rafah nung aliba "humanitarian city" kati belentsüba sentong ya teti asoshi ainshidaktsütsü merangba nung shilem ka lir, ta Palestine ketdangsüri aitsü.

"Egypt arütsülen civilian tem anidentsüba nükjidong ya parnok Rafah arütsü alema Egypt mesüra tzüyim leni meindoktsü asoshi lir," ta ketdangsüri ashir.

Hombarnü Katz-i Israel nunger osangbener den jembidang, Palestine nunger 600,000 shi alitsü aser iba sülen nütsüng yongsük ajunga, 2.1 million alitsü asoshi Rafah nung camp tasen yanglutsü sentong renemang ta totuyuba agütsüogo, ta ashir.

Iba sentong nungya Palestine nunger tem Israel sepaitemi security screened asütsü aser iba sülen aitdaktsütsü aser ainshitsü memelatsü.

Hamas-i anir October 7, 2023 nü Israel south tsütsü maka nisung 1,200 shi tepseter ano nisung 251 pua bener aoba langzüa Israel mitkari Gaza amak tenzük.

Iba sülen Gaza nung tang tashinung nisung 57,823 tepsetogo ta Gaza nung Hamas meyong health ministry ajanga ashir.

Myanmar Buddhist monastery amak, nisung 23 tepset

Sagaing, Chiteni/July 12 (Agencies): Myanmar mitkari linük tiyonglen Buddhist monastery ka nung tayimtsü amshia amakba nung tanur pezü densema civilian 23 asü.

Iba lendong ya Brehostibarnep Sagaing township kübok Lin Ta Lu yimtsüng nung ataloka liasü, koba Mandalay yimti nungi northwest tsütsü kilometre 35 shi pilar mitkar yimsüsüba anemer kanga tashi ita lir.

Iba region nung military operations aliba ajanga nisung 150 dak tema jenoka aliba monastery ka nung tenük yoker anepdang 1:00 ako meta amak, ta osang ajanga ashir.

"Tanur pezü densema civilian 23 tepset. Ano nisung 30 shi yiru. Parnok nisung ter takum mekumzüktettsüsa lir,"

ta yangji aliba resistance group nungi züngsem kati osangbener dang ashir.

Ano independent news outlet Democratic Voice of Burma-ibo nisung 30 asü ta ashir, saka tejangja masü. Myanmar mitkari iba tesem amakba indang sangdong agüja mali.

Mitkar temi yimsü asüba anema nokdakertem tashi ita aliba Sagaing region nung mitkar temi tashiyim tali amshiba nung iba monastery amakba ya ka alitsü, aser mitkar temi tawa iba tesem nung tashiyim kanga amshia amak, aser yangji aliba opposition telok tem nungi item tesem tanaben agitsü meranga tanks aser aircraft tem yoka liasü.

Opposition National Unity

Government indang odongtar Nay Phone Latt-i, "Vote magidang mitkar yimsüsüri tashi sayuner, aser iba ya ajanga parnok yimsüsüba menden nung alitsü asoshi yaritsü imlar," ta Myanmar junta temi küm tatemlen national elections agitsü sentong aliba athishia ashir.


2021 küm February ita mitkar temi tashiyim amshia election ajanga shima aliba Aung San Suu Kyi sorkar atsüngdoka democracy bhukuma nokdaker tesem ajungalen nungi adok aser mitkar temi tashiyim amshia parnok aziüktsü merang. Iba sülen armed resistance ya linük timba, talisa Sagain nungi tali tesashiba adok, kong civilian aser community militias temi mitkar anema nokdaker.



OFFICE OF THE
AKHOYA STUDENTS' UNION
P.O. Changtongya Town, Pin-798613
District: Mokokchung, Nagaland

TENÜNGSANG AGÜTSÜR

"Akhoya Shisaluyimer Telongjem" züngsem nungi Wb. N. Toshi Longkümer aser Wt. Temendangla na jala **Kr.CHUBANARON LONGKUMER**-i B.A Major (HISTORY) Top 4 under Nagaland University nung takok tulu ngua Shisaluyimer Telongjem nem tang masü saka yimer yimsanger ajak nem konang nüngsang tulu bener arutsü nung kangasa pelaba den tenüngsang tulu agütsür. Tarutsü anogotem nunga ne sempet aser mapa tajung ajanga maneni tenüng tajung aser takok ngutettsü asoshi asen "Akhoya Shisaluyimer Telongjem" Sarasadem.



Sd/-
(Sb. Wapangtoshi k jamir)
Tir

Sd/-
(Kr. Asenla lmti)
Tongti Zülür

Office Of The
Wameken Laishir Telongjem
Wameken Village
P.O Tuli Town-798618, Dist: Mokokchung, Nagaland.

Washiloktsür

Wabong Talitemjen Jamir aser Watsü Opangnenla na jabaso Wabong Sentinungsang Pastor Kibubar lu nung tematiba tetushi nguteta Waromong Compound Baptist Arogo ajanga Kibubar küm 2025, July 6 anogo nung ordination agütsüba Wameken Laishir Telongjem ajanga tepela tulu Washiloktsür.

Tsüngremi Pa tenzüker taküm kibong aser Waromong Compound Baptist Arogo tali moajangma.

Sd/-
(Sentichuba)
President
Wameken Laishir Telongjem

Sd/-
(Narola lmsong)
General Secretary
Wameken Laishir Telongjem

ALI AYOKER

AT NIHOTO VILLAGE, NEAR 4 LANE
PLOTAVAILABLE ANY SIZE
Rate: Rs. 170/Sq. ft.

- Contact -
9612242850
7005386130

Sergey Lavrov-i N.Korea lenir Kim Jong Un ajuru

Moscow, Chiteni/July 12 (Agencies): Russian Foreign Minister Sergey Lavrov-i North Korea nung Kim Jong Un ajuruogo aser iba mapang Pyongyang-i Ukraine nung Russia indang rara bhukumba maneni jangjashia liasü, kong par sepai meyirijang aika tepsetogo.

Lavrov ta Kim-i agizük, ta Russia indang Ministry of Foreign Affairs ajanga Honibarnü Telegram nung ashir aser Wonsa nung tena ajurutepa teka agi salemtepba video ka lemsatepa liasü.

Lavrov-i North Korea semdangtsüba osang ya Russia aser North Korean state media temia sangdonger liasü, aser pa yangji Deobarnü tashi alitsü.

Russia-i Ukraine amakba nung rangloker linük ana tsüngta mitkar aser yimtenren tesendaktep akangshia kumer Moscow ketdangsür temi North Korea aiben semdangba rongnung ibai tesüsaba alitsü.

Ukraine nung küm asem dak tali raraba mapang Pyongyang ya Moscow indang tongti tembar tem rongnung ka kumogo aser Russia nung Kursk region nungi Ukraine sepaitem agenba nung Kremlin yaritsü asoshi sepai meyirijang aika den nok-nü yoka lir.

Russia-Ukraine rara nung North Korean sepai 6,000 dak tema süogo, ta British Defence Intelligence ajanga ashir.

Yangji ki o jen tanaben yanglushiba nung yariteptsü asoshi North Korea-i military engineers aser kisü-jensür 6,000 yoktsü mulungogo.

South Korean itdangiter temi

ashiba agi, North Korea-i July mesüra August ita sepai tali yoksemtsü renema alitsü.

Iba melen Kim-i Russian technology meshitsü akok, koba ajanga par nuclear nok-nü aser sepaitem tashi itshitsü akok, ta United States aser South Korea ajanga tebilemtsü lemsatepa lir.

Honibarnü Lavrov-i North Korea indang Foreign Minister Choe Son Hui den Wonsan yimti nung ajurutep. Iba yimti ya North Korea anüdoklen tzükum nung lir, kong ita tetenzüklen resort tuluka lapoka liasü.

"Onoki Ukraine mepetmesü meketa aliba tensa indang tangatetba lemsatep... Asen Korean tembar temi iba special military operation nung nükjidong ajunga nung aser Russian lenir aser armed forces inyakyim nung yaritsü jangja shiogo," ta Lavrov-i ashir.

North Korean sepaitemi tasü tait mapa inyakba atema pai pelaba lemsatep, ta Russian Foreign Ministry ajanga ashir.

April ita linük ana yagi North Korean sepaitem Russia-i yokba yimjak nung jangjatsü aser item sepaitem teyari nung Russia-i Kursk region tanaben rakzükogo ta ashir, koba Ukraine-itiazü ta ashir.

Russia indang Security Council Secretary Sergei Shoigu-ia taküm Pyongyang ya aiben semdangogo.

Taoba küm November ita Russia Tir Vladimir Putin-i North Korea semdangba mapang linük ana tsüngta mitkar tsütsü tezüngzüktep balala zülutepa liasü.

Mkg. nung Basketball tournament tembangogo



Mokokchung nung 1 st Inter High School & Higher Secondary School Annual Basketball Tournament 2025 akaba nung tetsür Champion QMHSS aser tebur Champion QMHSS pur külemi tangokba npksa nungji angur.

Mokokchung, Chiteni/July 12(TYO): Basketball Association Mokokchung District (BAMD) - i ayongzüka 1 st Inter High School & Higher Secondary School Annual Basketball Tournament 2025 akaba tanü tembangogo.

Iba tournament ya BAMB Basketball Court Imkongmeren Sports Complex nung High School & Higher Secondary School 13 nungi aruagi shilem agiogo.

Tanu tetsürtem Final Queen Mary Higher Second-

ary School(QMHSS) aser Eden Academy tsüingda asayaba nung QMHSS-i Score 15-05 agi Eden Academy koka takok marok aben.

Teburtem Final Queen Mary Higher Secondary School(QMHSS) aser Mayangnokcha Govt. Higher Secondary School tsüingda asayaba nung QMHSS-I score 29-20 agi MGHSS kochteta takok marok benogo.

Tanu iba tournament shibangba sentong tatsüka agiba mapang Tutu Jamir-I sentong ketdang asü aser Akangtemsü Yaden Youth

Director MTBA-I sarasadema sentong tenzük aser Moakokla-i ken tajung ka atenba den tetushi tejaoker Major Hemant Singh 12 Assam Rifles, Mokokchung ajanga tayongzüka o jembia asayartem ayongzüka liasü.

Mokokchung nung Basketball asaya ajungkettsü mangdang nung tang iba tournament nung shilem agir asayartem nungi BAMD-i asayar tetsür 14 aser tebur 24 ta shimtetogo aser parnok nemji BAMD ajanga coaching agütsütsü.

1buba Inter-Khelo India Boxing asayamung asayaago

Kohima, Chiteni/July 12

(TYO): Department of Youth Resources & Sports (YRS), Nagaland-i ayongzüka mezümbuba Inter-Khelo India Centre (KIC) aser Khelo India State Centre for Excellence (KISCE) Boxing asayamung asayaago. Iba asayamung ya tebur aser tetsür Junior aser Sub-Junior asayartem atema liasü, koba Hokolbarnü Indira Gandhi Stadium, Kohima nung asayaago.

Kohima aser Wokha district nungi asayartemi iba asayamung nung shilem agia liasü, koba department-i

ashi.

Sekhose-i ashiba agi, football, volleyball, aser basketball amala asaya nüngtugu kümogo, saka boxing atema technical management jenjang temaba ka nüngdaker.

Director-isa, Chief Minister Neiphiu Rio lenisüba nung küm tatem tashi nungbo state nung indoor stadiums 31 yanglutsü sentong aliba metetdaksü.

Item facility tem nung boxing ring tem aser qualified coach tem densema alitsü imlar, koba grassroots training jenjang tajungba küm daksütsü asoshi lir ta pai



ayongzüka iba amala mesükba mezümbuba asayamung liasü.

Setong nung o jembiba mapang YRS Director Kethosituo Sekhose-i, "kümtem tsüingda state aser talisang yimdak yimtsüngtem nung boxing asayamung ayongzüka asayaba mongui aruogo. Iba ya specialized asaya ka aser asayartem kümzüka toktsütsü atema training shitak agir aliba professional tem nüngdaker," ta

ashi.

Maneni pai asayartem dang nükjidong tulu ayutsü aser 2036 Olympics nung India tenüng nungi asayatsü atema merangsü ajungshi, koba Ahmedabad, Gujarat nung ayongzüka asayatsü akok.

Iba sentong ya YRS Joint Director Jakedovo Chase lenisüba nung agi aser Youth Resource Officer Viruokuo Zumu-i lokti pela agizükba o jembia liasü.

37 buba Mokokchung District Badminton Open Championship takok manung tembangogo



37 buba Mokokchung District Badminton Open Championship nung takokertemi senpet agizükür külen tayongertem den külemi tangokba noksa nung angur. Mokokchung, 12th July, 2025

Mokokchung, 12 July (TYO): Mokokchung district badminton association (MDBA)-i ayongzüka 37 buba Mokokchung District Badminton Open Championship 2025 sentong July 10 nungi tenzüka anogo asem nü tashi yangi Indoor Badminton Stadium, Mokokchung nung asaya-a mungogo.

Taküm iba asayamung nung tebur o tetsür na densema arishi küm telemsa 13 liasü aser arishi telemsaji under 9 nungi under 55 tashi liasü. Asayar ajak senteper 108 (tebur 85 aser tetsür 23).

Asayamung tepiyong nung asaya 119 asaya-a liasü. Iba asayamung nung asaya telemsa balala nung Mokokchung district tenüng nung shilem agitsüpar parnok 55 shimogo aser joko yakta terenemshiba tenzüksü ta MDBA ketdang sürtemi metetdaksüogo. Angazükba agi, tan July ita 29 nungi taruba ita August 1 tashiji Chumoukedima nung Inter-district badminton tournament ka asayatsü lir.

Arishi küm aser asaya telemsa balala nung takoker

mezüing (winner) aser tanabuba (runner up) jenjang ajangzüker nem senpet sen den kulikaket aser medal agi senpettsüogo.

Iba asayamung shibangba sentong nung L.L Group Dimapur, Managing Director, Longden Longkumer tetushi tejaoker liasü aser pai asayartem dang temesepba chiyungtsü nungi pilar taremzü, tazüokba, mapang shitak amshiba aser pei temang shitak anepaluba nübu kaka asüba den meranga asayatsü asoshi ayongzüka metetdaksü.

CATEGORY BALALA NUNG TAKOK ANGURTEM:

UNDER 17 GIRLS:

44-46 Kg: Winner - Liyani Ezung; 2nd - Abikali
48-50 Kg: Winner - Alona Chopi; 2nd - Sochano Lapon
52-54 Kg: Winner - Neihoilam Hangsing; 2nd - Tumchobeni Kikon

UNDER 15 BOYS:

50-52 Kg: Winner - Kulungoi Sapu; 2nd - Dendemo Murry
35-37 Kg: Winner - Lansothung Khuvung; 2nd - Kevingulie Rio
40-43 Kg: Winner - Shachu

46-49 Kg: Winner - Eshenthung P. Yanthan; 2nd - Pausuing Hega

50-54 Kg: Winner - Epithung Tsopoe; 2nd - Nzan Ngullie

UNDER 15 GIRLS:

37-40 Kg: Winner - Diethonienuo; 2nd - Zhapu

UNDER 10 BOYS:

28-30Kg: Winner - Diezezo Solo; 2nd - Khungo T. Shiu

24-26 Kg: Winner - Liremo P. Yanthan; 2nd - Vippheto

Under 48 Kg Girls: Winner - Senthunglo T. Jami, 2nd - Meribeni W. Ngullie

Under 52 Kg Boys: Winner - Senkathung, 2nd - Lochanthung.

BILEMDANGANG

"Tetsübu agi nisung ka azüokdaksür."